

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 195 del 31/01/2025

I studenc de la universitàes de Dispruch, Busan e Trent i pel se scriver ite te la edizion 2025

Euregio Brussels School 2025: se pel se enscinuèr enscin ai 28 de firé

[Ladino] Cognoscer l lurier de la istituzions europeènes a Bruxelles, entener i mecanismes e i doeres de la Union europea e de la diplomazia internazionèla, descorer a na vida direta con politics e funzionères de aut livel e arjonjer i credic ECTS (European Credit Transfer System) per sie cors de laurea: chest i lo podarà endò fèr via per l'istà 2025 i studenc scric ite a n Master de la universitàes de Busan, Dispruch e Trent. La enscinuazions al Euregio Brussels School 2025 les é orides e ge vel les fèr dant che sie fora i 28 de firé.

L cors interdisciplinèr l vegn endrezà dal Ofize de coleament del Euregio Tirol-Sudtirolo-Trentin a Bruxelles. L é la 14a edizion e l sarà endrezà dai 23 ai 27 de jugn del 2025 te la capitala belga e l é out ai studenc scric ite a n Master, tout fora i studenc Erasmus+, de duc i corsc de laurea de la universitàes scrites dant, col fin de arjonjer credic direc per sie cors de laurea, che ge vel zertifichèr enstesc dantfora.

L president de la Provinzia de Busan e president ades del Euregio Arno Kompatscher, l president de la Provinzia Autonoma de Trent, Maurizio Fugatti e l capitan del Tirol Anton Mattle i engaissea i studenc a se candidèr per l projet de formazion, col sottrissèr che spartir coi etres e viver a na vida serena te l'Union Europea l é na condizion de gran valuta che vegn fora dal esser bogn e voler lurèr adum. La cooperazion anter i Stac, Regions e Provinzies a Bruxelles la svilupea azions che dèsc ejic direc tel viver de ogne dì de duc i sentadins. “Per ogne sentadin responsabol fèsc besegn tor consaputa di mecanismes de la politica e de l'aministrazion de la UE; l é percacent e de fazon per n svilup de sia comintèdes, ge jir do da vejìn al prozes legislatif de la UE. L é dassen emportant, ence, per la aministrazions publiche e per i stakeholder di raions, formèr e tor ite esperc te la organizazion e tel modus operandi de la UE e del Euregio” disc Kompatscher, Fugatti e Mattle.

Vegn chiamà a se candidèr soraldut chi che vel meter adum sia cognoscenzes academiches con aprofondimenc pratics e baratèr idees coi responsaboi politics europeans e coi studenc del Euregio Tirol-Sudtirolo-Trentin.

L program l é de enteres ence per chi che volessa fèr na cariera ti ciampes desche la politica, la storia contemporana, la traduzion e i studies culturèi o che vel demò meter a jir rees internazionèles e cognoscenzes soravia la seides.

Duta la informazions dintornvia la enscinuazions les é sun [chest link](#) (per ingleis)

Traduzion di Servijes Linguistics e Culturèi del Comun general de Fascia

(cdt)